

# Malakias

E último palabranan di Dios den Tèstamènt Bieu ta hañá den e buki di Malakias. E buki ta konkluí e relatonan bibliko di historia di Israel (2000-400 B.C.). E tambe ta forma un brùg entre Tèstamènt Bieu i Tèstamènt Nobo dor di su mensahenan profétiko di binida di tantu Juan Boutista (3:1; 4:5) komo di Kristo (3:1-6). Malakias a prepará lektornan di Tèstamènt Bieu pa Tèstamènt Nobo.

Den hopi sentido, Malakias ta un buki tirstu, pasobra e ta mostra ku Israel no a progresá mashá spiritualmente desde su infansia 1500 aña anterior. Ma tòg e buki ta klousurá ku e speransa di un dia glorioso ora Israel ta repentí.

## I. OUTOR DI E BUKI

Malakias (na idioma hebreo *mal'aki*) ta nifiká “mi mensahero” òf “mi angel.” E palabra *mal'aki* ta bin di e palabra *mal'ak-yah*, ku ta nifiká “mensahero di Yehova”.

Pa e motibu aki, algun studiante di Beibel ta kere ku e outor no a duna su number mes. Septuiginta (Tèstamènt Bieu tradusí na idioma griego) ta tradusí e palabranan “pa medio di Malakias” (1:1) ku e palabranan “pa medio di Su mensahero (angel)”. Pues, e traduktornan di Septuiginta a haña ku e outor a identifiká su puesto, no su nòmber. Hende ku tin e kreensia ei ta pensa ku e bèrdadero outor por tabata Esdras, Nehemias, Hageo, Zorobabel òf Mardoqueo.

Si esei ta e kaso, Malakias ta e úniko buki profétiko ku no ta duna nòmber di e outor humano. Di nos punto di bista, ta mas probabel ku Malakias ta nòmber di e outor mes.

Ta notabel ku Malakias a usa e palabra “mensahero” (loke su nòmber ta nifiká) tres biaha den su buki. E promé biaha, el a yama un saserdote “mensahero di SEÑOR di ehèrsitonan” (2:7). E di dos biaha ku el a usa e palabra, el a yama Juan Boutista “Mi mensahero” (3:1). Juan Boutista no solamente tabata un kumplimentu di Malakias su profesianan, ma e tambe a inisiá su ministerio unda Tèstamènt Bieu a konkluí. Malakias a anunsiá ku e siguiente stèm ku Dios Su puebel lo tende lo ta bos di e anunsiadó di e Mesias. E puebel hudiu mester a warda mas òf ménos 400 aña pa Juan Boutista aparesé. E di tres okashon ku Malakias a usa e palabra “mensahero” tabata relashoná ku e Mesias “Mensahero di e aliansa” (3:1).

Nos no sa nada di Malakias su persona. Malakias—méskos ku Abdias—no a menshoná su antepasadonan. Su buki ta duna impreshon ku el a biba na Yerusalèm, ma asta esei no ta sigur. Opservando su komentarionan tokante e saserdosio, algun ta pensa ku Malakias lo tabata un saserdote. Ma no tin evidencia konvensiente pa esei tampoko. Tradishon hudiu a konsiderá Malakias, Hageo i Zakarias lidernan den e Gran Snoa (un konsilio di eskribanan i otro lidernan hudiu ku a yuda reorganisá e bida religioso i kultura di e hudionan despues ku nan a regresá di

koutiverio). Ma esei tampoko no ta sierto. E echu ku Malakias no a duna informashon tokante su person ta siña nos ku e mensahe ta e kos importante, no e mensahero!

Malakias lo tabata un hòmbler sensible pa ku e seriedat di piká. E tabatin konvikshonnan firme kontra divorsio (2:10-16) i inhustisia sosial (3:5). E lo tabata un hòmbler di integridat i kurashi (demonstrá dor di su denunsia di e saserdotenan i hendenan prominente (1:1-14; 2:1-4; 3:2-4).

Ta parse ku Malakias lo a prediká su mensahe i despues skirbié den forma di un buki mas ku shen aña despues di koutiverio na Babilonia.

## **II. LEKTORNAN DI E BUKI**

E puebel hudiu tabata sensible pa ku Palabra di Dios den era di profetanan Hageo i Zakarias. Ma algun aña despues, ora Malakias a apresé riba pantaya, ya kaba nan a flakia bastante spiritualmente. Maske di aparenzia, nan a parse deboto i religioso, echu ta ku nan a pèrdè nan temor pa Dios. Nan no tabata obedesidu i leal pa ku Dios mas.

Malakias a dirigí su palabranan spesífikamente pa ku e saserdotenan (2:1), lidernan i puebel hudiu ku a regresá na nan tera despues di eksilio. Kisas nos por bisa ku eksaktitut ku Malakias a skirbi prinsipalmente pa esnan bibando den e siudat di Yerusalèm i bisindario (1:2).

Malakias tabata e último profeta di Dios ku a reprendé e puebel hudiu promé ku kuater siglo di silencio.

## **III. FECHA DI E BUKI**

Malakias no a duna un fecha pa su buki. Sinembargo, contenido di e teksto ta duna algun indikashon di un fecha general. Ma promé ku nos ta nota esei, lo ta bon pa repasá un tiki di e historia di hudiunan den e era ei.

### **A. INTRODUKSHON HISTÓRIKO**

Na aña 586 B.C., ehèrsito di Balilonia a destruí Yerusalèm i e tèmpele. Babilonia a deportá hopi di e huiunan for di nan pais. Ma 47 aña despues, imperio di Babilonia mes a kai. Un aña despues, (538 B.C.), rei Siro a saka un dekreto ku tur eksiliado por regresá na nan mes pais. Un grupo di hudiu, bou guia di Zorobabel a bolbe na nan tera (536 B.C.). Nan a lamta un altar i a kuminsá konstruí e tèmpele mes ora. Esdras 1-3 ta konta e storia. Ma dentro di poko tempu, nan a pone paro na konstrukshon di tèmpele. Despues ku Dario I a bira rei di imperio medo-persia (522 B.C.), profetanan Hageo i Zakarias a enkurashá e hudiunan pa sigui konstruí tèmpele. Nan a hasi esei i a kompletá nan trabou na aña 516-515 B.C. (Esdras 5-6).

Na aña 457 B.C., e di dos grupo di hudiu a regresá na e tera ku Dios a primintí nan, bou guia di Esdras (Esdras 7). Anto Nehemias a regresá na Yerusalèm (Nehemias 1-2) na aña 445 B.C. Komo gobernadó di Juda, inmediatamente Nehemias a motivá e hudiunan pa konstruí e murayanan di Yerusalèm. Aproximadamente na aña 433 B.C., Nehemias a bolbe na Babilonia anto a regresá bèk na Yerusalèm pa sigui goberná e pais (430 B.C.).

### **B. YEGANDO NA UN FECHA**

Diferente fecha ta surgerí pa e buki di Malakias. Ma laga nos nota algun di e indikashonnan ku e teksto mes ta duna:

1. Eventonan históriko ku por indiká e fecha
  - a. Tabatin un gobernadó pèrsiko

E palabra ku ta usá den Malakias 1:8 pa “governadó” ta e palabra pa un gobernadó pèrsiko na Palestina, *pehah*. Por ehèmpel, Nehemias, apuntá dor di rei di Persia, tabatin tantu e titulo *tirshatha* (Nehemias 7:65,70; 8:9; 10:1) komo *pehah* (5:14,18; 12:26). Esaki ta indiká ku e buki tabata skirbí durante e periodo ku e imperio di Persia tabata manda riba e pais hudiu. E era pèrsiko a kuminsá na aña 539 B.C.

b. E hudiunan tabata hasi sakrifisio

Segun 1:7-10 i 3:8, puebel di Dios tabata hasi sakrifisio. Hudiunan no por a hasi sakrifisio te ora nan a yega Yerusalem i konstruí e altar. Esei ta indiká ku e buki di Malakias mester ta fechá despues di 536 B.C.—tempu ku algun hudiu a regresá di eksilio i a konstruí e altar.

c. E tèmpep ya kaba tabata konstruí

Malakias 3:1 ta menshoná e tèmpep. Maske e teksto aki no ta indiká sigur ku e tèmpep tabata konstruí kaba, esei sinembargo ta e implikahon. E tèmpep a keda konstruí na aña 516 B.C. Pues, Malakias a skirbi su buki despues di e fecha ei.

d. E edomitanan ya kaba a wòrdu ekspulsá for di nan teritorio

E arabirnan nabateanan a kuminsá kore ku e edomitanan durante e periodo ku e hudiunan tabata den koutiverio (despues di 586 B.C.). E edomitanan a wòrdu konkistá i umiyá asina tantu ku Malakias a deskribí nan habitashon anterior komo “desolashon” (1:3).

e. E murayanan di Yerusalem lo tabata konstruí kaba

Den 1:2-5, Dios ta laga sa ku E ta stima Su puebel riba desendientenan di Esau (Edom. Lo tabata ridikulo pa Dios argumenta ku E ta stima Israel mas ku Edom desolá si Yerusalem tambe tabata un desolashon. Sin duda e murayanan di Yerusalem ya kaba tabata konstruí di nobo, loke a sosodé bou guia di Nehemias (mas òf ménos na aña 444 B.C.).

Probabelmente Malakias a deskribí un pais muchu mas desaroyá ku murayanan so—mustrandó e kontraste kla entre Israel i e “desolashon” di Edom. Pues, nos por asumí ku Malakias su ministerio lo no a tuma lugá inmediatamente despues di konstrukshon di e murayanan. Talbes nos por dedusí for di esaki ku Malakias lo no a skirbi durante e promé diesdos aña ku Nehemias tabata gobernadó, ora konstrukshon tabata tuma lugá (Nehemias 7-12).

2. Opservashonnan adishonal ku por indiká e fecha

a. E buki no ta kuadra ku e promé parti di e era di Esdras

Malakias 1:7-8,12 ta laga sa ku e hudiunan tabata profaná e ofrendanan. Maske Esdras a kombati diferente maldat, profanashon di kos sagrado no tabata un maldat menshoná.

Ademas, den era di Esdras, rei a kubri gastu di loke tabata nesesario pa e ritonan ku a tuma lugá na tèmpep (Esdras 6:9-10; 7:17-20). En kontraste, den e buki di Malakias, tabata e hudiunan ku a trese ofrendanan (1:6-8; 3:8-10)—algu ku lo no tabata nesesario den era di Esdras.

b. Ta dudoso ku Nehemias tabata e gobernadó di 1:8

Nehemias—un hudiu—lo tabatin mas kompreshon pa un regalo ku tabatin defekto, en kontraste di un gobernadó pagano. Ademas, Nehemias a sòru pa su mes nesesidatnan (Nehemias 5:14-15), pues e regalo menshoná den 1:8 lo tabata innesesario. Tambe si e gobernadó menshoná den 1:8 tabata Nehemias, lo no ta lógiko pa Malakias menta su nòmber?

c. Ni Esdras ni Nehemias a menshoná e profeta Malakias

Ta notabel ku Esdras a menta nòmber di dos profeta, Hageo i Zakarias (Esdras 5:1; 6:14). Ma ni Esdras ni Nehemias a menshoná Malakias. E echu ku nòmber di e profeta di Dios no ta aparesé den e buki, no ta un indikashon konklusivo ku Malakias su ministerio no tabata durante nan era. Ma di otro banda, nan silensi por duna algun indikashon di e fecha ku e buki di Malakias a wòrdu skirbí.

d. Malakias i Nehemias talbes a denunsiá e mésun pikánan

Ta parse ku algun di e pikánan ku Malakias a denunsiá tabata algun di e mésun pikánan ku Nehemias a kombatí tempu ku e tabata gobernadó pa di dos biaha (430-425 B.C.). Tantu Malakias komo Nehemias a menshoná saserdotenan nonshalant i korupto (1:6 – 2:9; Nehemias 13:1-10), hudiunan kasando ku paganonan (2:11-16; Nehemias 13:23-28), negligensia di e diesmo i levitanan pover (3:7-12; Nehemias 13:10-13). Segun G. Campbell Morgan, “E frakasonan di e puebel ku a pone Nehemias rabia, a inspirá e mensahe di Malakias.” Si nan a biba na e mésun tempu, Malakasi i Nehemias lo tabata koleganan den bataya kontra piká.

Ma di otro banda, ta straño ku Malakias no a menshoná algu tokante Nehemias su reformashonnan. Nehemias a bringa duru kontra e abusonnan aki. Pues, ta parse ku e pikánan deskribí pa Malakias lo no a sosodé durante tempu Nehemias tabata gobernadó.

Esei ta laga solamente dos pusibilidat tentativo. Nos por konkluí ku e buki di Malakias a wòrdu skirbí durante Nehemias su ousensia for di Yerusalèm (Nehemias 13:6) na añanan 433-425 B.C. E otro pusibilidat ta ku Malakias a profetisá despues di Nehemias su era (despues di 420 B.C.), mas ku shen aña despues ku nan tabata bèk den e tera. Talbes ta mas mihó pa bisa simpelmente ku Malakias lo a skirbi su buki mas na fin di siglo sinku—mas òf ménos 400 aña promé ku Kristo.

### C. OKASHON PA E BUKI

Despues ku e hudiunan a kuminsá regresá for di eksilio na Babilonia, nan a kuminsá bira indiferente pa ku Señor. Hageo i Zakarias a batayá kontra nan indiferensia spiritual i a enkurashá finalisashon di konstrukshon di tèmpe, loke a tuma lugá na aña 516 B.C.

Profetanan a pronostiká un era di bendishon binidero. Ma dékadananan a pasa sin ku e hudiunan a mira kumplimentu di e profesianan. Nan a kuminsá duda si Dios di bèrdad a stima nan (1:2). Nan a puntra nan mes di Dios ta hustu (2:17), si a bal e la pena pa sirbi Señor (3:13-15). Nan tabata desanimá, deskurashá, desapuntá, ku kurason kibrá, sin speransa. Segun Irving Jensen, “E fe i adorashon di e hudiunan tabata desparesé i nan bida diario a demonstrá esei. Den e kondishon spiritual deplorable aki, nan tabata èkstra kritiko di Dios... E echu ku Dios asta a papia mes ku nan ta evidensia di Su pasenshi i misericòrdia.”

Malakias a aparesé ora un biaha mas e entusiasmo religioso di e hudiunan a flakia. Nan a bira spiritualmente indiferente i a deskuidá moralmente. Segun J. Vernan McGee, “E profesia di Malakias ta revelá un era insensible pa ku piká. Nan tabata drogá te bira inkonsiente di piká. Nan tabata sorprendí ku Dios a akusá nan. Nan a plei ignorante. Nan a pretendé di sa tur kos, pero a falta konosementu esensial.”

Malakias a sigurá nan ku e Mesias lo bin sigur. Ma el a laga nan sa ku E lo aparesé diripiente pa huzga esnan ku no ta repentí i obedes’E (Malakias 3-4).

## IV. PROPOSITO PA E BUKI

Tantu e proposito komo e lema di e buki ta revivamentu...pa e hudiunan spièrta for di nan soño i apatia spiritual. Pa esaki por sosodé, Malakias a mostra riba:

### A. NESESIDAT DI REVIVAMENTU

Henter e buki ta un yamada pa puebel di Dios repentí di nan piká i pa bolbe humildemente serka djE. Malakias a mostra e hudiunan algun piká spesífiko ku ta e kousa di nan dekadensia spiritual. Entre otro, Malakias a menshoná kasamentu ku hende pagano, keda sin

duna diesmo, ofresiendo bestianan defektuoso, èts. Tambe e buki ta avisá ku Dios Su huisio ta bin pa esnan desobediente i rebelde (3:1-2).

## **B. RESULTADONAN DI REVIVAMENTU**

Malakias a laga sa ku ora tin restorashon spiritual, nan lo eksperensiá Dios Su bendishon awor i tambe den future (ku binida di “Elias” i tambe Mesias).

Henter e buki ta un apelasjon—pa repenti i bolbe serka Dios. E apelasjon ta kompañá pa un gran promesa si nan reashoná positivo i un aviso negativo si nan nega.

Por bisa ku Malakias a deseá e siguiente reashonnan práktiko i spesífiko pa ku su mensahe pa repenti: 1) purifikashon di saserdotenan indiferente i korupto, 2) transformashon di adorashon insinero i laf pa adorashon ku ta agradá Dios, 3) un paro pa ku e abusonnan ligá ku e diesmo i sakrifisionan na tèmpe, 4) restorashon di relashonnan familiar kibrá, i 5) introdukshon di un programa di huisio sosial basá riba étika bíbliko.

## **V. LEMANAN DEN E BUKI**

Nos por deskubrí diferente lema den e buki. Un lema por ta: Sinserdad pa ku Dios i un bida santu ta apolutamente nesario pa e nashon hudiu por eksperensiá Dios Su bendishon den forma di un bon kosecha i prosperidat ekonómiko. Komo un nashon santu, Israel mester spera binida di e Mesias, Kende pa medio di Su ministerio di kuramentu i huisio lo hiba e nashona na e realisashon di loke nan ta antisipá.

Un otro lema den e buki ta enfatisá Dios Su relashon di aliansa pa ku Israel. Malakias a mensioná e aliansa ku Levi (2:1-9), aliansa di e tatanan (2:10), aliansa di matrimonio (2:11-16) i Mensahero di aliansa (3:1).

Malakias tambe tabata interesá pa e puebel tin un bista korekto di Dios. E tabata ke pa nan tuma Dios na serio i bandoná nan pikánan.

Otro lemanan den e buki ta: Dios Su amor, piká di saserdotenan i puebel, huisio pa piká, divorsio i bendishon pa rektitut.

## **VI. STRUKTURA I KONTENIDO DI E BUKI**

### **I. APELASHON INISIAL – 1:1-5**

Dios a selektá Jakòb (Israel) na lugá di Esau (Edom) i a bendishoná Israel miéntras kasi por bisa ku e edomitanan a desparesé. Kòrda ku 1:3 tabata skirbí hopi siglo despues ku Esau a muri! Dios ya kaba a kastigá Edom!

### **II. AVISO TOKANTE PIKÁ DI SASERDOTENAN – 1:6 – 2:9**

Ta klaro ku Dios tabata dirigí Su palabranan na e saserdotenan dor di Malakias (1:6; 2:1,4,7,8). Nan tabata neglighá nan responsabilidatnan.

#### **A. Aktitut Robes pa ku e Person di Dios – 1:6-14**

Nan no a respetá nòmber di Dios (1:6,11,12,14; 2:2,5). Kon nan a demonstrá nan aktitut? Dor di ofresé bestianan mankaron (1:7-8,12-14). Dios ta deseá lo mihó! Awendia E no ta rekerí bestianan. Ma ainda Dios ke lo mihó: bo bida (Romanonan 12:1).

#### **B. Aktitut Robes pa ku Nan Tarea di Instrukshon – 2:1-9**

E levitanan (saserdotenan ta levita) tabatin e tarea pa instruí e puebel di Dios (2:4-5). Ma nan tabata guia e puebel den un mal kaminda dor nan mal ehèmpel i nan

siñansa (2:8-9). Dios Su kondenashon a kuminsá ku e lidernan. Si e lidernan spiritual no ta loke nan mester ta, no por spera mihó di e puebel.

### III. AVISO TOKANTE PIKÁ DI E PUEBEL – 2:10 – 4:3

#### A. Aktitut Robes pa ku Matrimonio – 2:10-16

Hòmbernan hudiu a divorsíá nan esposanan i kasa ku muhénan pagano (2:11). Komo mensahero di Dios, Malakias a kondená dos maldat relashoná ku esaki. E denunsianan ta mes nesenario i apropiá awendia.

##### 1. Divorsio

Divorsio a para bira—méskos ku awendia—un kos masha normal tantu den mundu komo entre keyentenan. E mentalidat ta, “Si bo no ta gusta manera e ta peña su kabei, manehá outo, primi e tubu di pasta di djente, èts. divorsio ta un opshon aseptabel!

Den e sekshon aki, Dios Su palabranan ta masha skèrpi i kategóriko. El a deklará bon kla, “Mi ta odia divorsio” (2:16). Dios no a laga duda ku matrimonio ta algu permanente!

##### 2. Kasa ku hende inkomberso

Tantu hòben ku ta yama nan mes “kristian” ta ignorá Dios su mandamentu pa kasa solamente ku un kreyente. Palabra di Dios ta enfatisá esaki ripetidamente (Éksodo 34:13-16; Deuteronomio 7:3; 1 Korintionan 7:39; 2 Korintionan 6:14).

Dios sa kiko E ta papia! E sa ku un matrimonio entre un kreyente i un no-kreyente ta kousa tur klase di problema i instabilidat den e matrimonio. Esun ku no ta paga tino na e mandamentu aki di Dios, ta buska problema pa su mes!

#### B. Aktitut Robes pa ku Karakter di Dios – 2:17-3:6

E puebel hudiu tabata akusá Dios ku E no ta hustu (2:17). Nan tabatin e mentalidat, “Tantu bal pa mi biba pa Dios! Pekadornan ta gosa i Dios no ta kastigá nan. Ami ta sirbiE, ma Dios no ta dunámi bendishonánan special.” Ma Dios a kontestá, “Mi lo huzga!” “Ata, E ta bin...ma ken por soportá e día di Su binida?” (3:1-2). No solamente Dios lo bin destruí e enemigunan di Israel (manera e hudionan a pensa), ma E tambe lo bin pa trata ku e piká den Israel!

Ta interesante pa nota tambe ku 3:1-5 ta laga sa ku Señor lo manda Su mensahero promé ku E mes ta aparesé na Su tèmpel. Malakias ta identifiká e mensahero ei komo e profeta Elias (4:5).

#### C. Aktitut Robes pa ku Plaka – 3:7-12

Nan a keda sin duna nan dèximo i ofrendanan na Dios (3:8). E dèximo i ofrendanan tabata pa mantené e levitanan i saserdotenan pa nan por sirbi Dios. Ta bon pa hasi bo mes e pregunta personal si bo ta fiel pa duna Dios Su parti. Si bo no ta hasi esei, bo tambe ta hòrta di Dios (3:8)!

#### D. Aktitut Robes pa ku Trato di Dios – 3:13-4:3

E sekshon aki ta similar ku 2:17 – 3:6. E mentalidat tabata ku no ta bal e la pena pa sirbi Dios. Dios tòg no ta kastigá e malbado ni ta bendishoná e rekto.

Maske e tempu di eksilio a kura Israel di nan atrakshon na idolatria, tòg en general nan no a buska Señor. Ma tabatin un grupito ku a keda fiel n’E. Nota e grupito ei den 3:16 ku a keda kayente spiritualmente maske mayoria di e puebel a flakia.

Dios ta laga sa bon kla ku E sigur lo kastigá e malbado (4:1) i bendishoná e hustu (4:2-3).

#### IV. AVISO FINAL – 4:4-6

Por bisa ku e aviso final ta: warda Dios Su mandamentunan i warda pa Mesias Su binida. Promé, tin e spièrtamentu pa obedesé Dios Su Palabra (4:4). Esaki ta siguí pa e profesia ku Elias lo bin promé ku Dios (4:5). E profesia aki a wòrdu kumplí ora Juan Boutista a aparesé promé ku Jesus (Mateo 11:12-14; 17:10-13). Di otro banda, talbes Juan no tabata e kumplimentu total di e profesia aki. Posíbelmente tin un otro “Elias” ku lo bin promé ku e segundo binida di Kristo.

Esaki ta e último mensahe ku e puebel hudiu a haña di Dios pa 400 aña. Dios Su silencio a kaba ora e angel Gabriel a aparesé na Zakarias (Lukas 1:11-20), tata di esun ku lo bin den spiritu di Elias, Juan Boutista.

Segun Graham Scroggie, “Malakias su mensahe ta sumamente nesesario i apropiá awendia, pasobra e abusonnan ta ripití den iglesia moderno. Kon komún ta e ‘aparensia di ta religioso,’ ma nengado e poder; kon debil ta e masanan di kristian pa ku e gran preguntanan moral; kon frekuente tin aliansa di matrimonio entre salbá i no-salbá; i ki un bèrgwensa ku kristiannan ta asina floho den e asunto di dunamentu di nan plaka pa sostené e obra di Dios. Malakias ta papia pa e situashon aki.”

Ta interesante tambe pa nota kon e buki di Malakias ta klousurá. “Maldishon” ta e último palabra di Malakias, i pues e último palabra di Tèstament Bieu. En kontraste, Tèstament Nobo ta klousurá ku e palabranan “e gracia di Señor Jesus sea ku tur e santunan. Amèn.” Lo a keda den un skuridat enorme si nos no tabata sa kiko a sosodé meimei di Malakias 4:6 i Revelashon 22:21!

## VII. OPSERVASHONAN DI E BUKI

### A. STAIL DI E BUKI

Malakias a hasi uso di un stail distinto for di e otro profetan. Nan a bin ku deklarashonnan manera “Asina SEÑOR ta bisa...” Ma esei no tabata stail di Malakias. El a presentá su mensahe den forma di un diálogo ku e huidunan. Maske algun profeta a usa e stail aki na sierto okashon, ningun otro profeta a us’é asina tantu. E ta un stail simpel, konsíso i ta komuniká su mensahe bon kla. Malakias a presentá un dialogo entre Dios i e puebel hudiu. Dios a papia mas ku binti biaha den e buki (“SEÑOR di ehèrsitonan” ta bisa—1:4,6,8,9,10,11, 13,14; 2:2,4,7,8,12,16; 3:1,5,7,10,11,12,14,16; 4:1,3). I e puebel tambe ta reakshoná ku hopi frekuensia.

Kasi e buki ta zona manera un pleitu. Un ta deklará algu, e otro ta keda interumpié kada ratu afirmanda ku loke el a bisa no ta bèrdat. Debí ku Israel tabata den un kondishon spiritual dekaí, nan a kuestioná i kritiká tur kos...asta Dios Su deklarashonnan.

Nos por detayá e stail di Malakias ku tres punto. 1) Promé ta bin un deklarashon of akusashon di parti di Dios. Por ehèmpel, “Boso ta hòrtaMi” (3:8). 2) Esaki ta siguí pa un protesta den forma di un interrogante sarkástiko òf defensivo di parti di e puebel hudiu. E preguntanan ta introdusí ku e palabranan: “Ma/tòg boso ta bisa” (1:2,6,7; 2:14,17; 3:7,8,13). Por ehèmpel, “Ma boso ta bisa: ‘Kon nos a hòrtaBo?’” (3:8). Buki di Malakias ta kontené 23 pregunta, dies di nan ta preguntanan retórik. 3) Anto Malakias a duna e kontesta (òf denuncia) di Dios ku evidensia. Por ehèmpel, “Ku dèsimu i ku ofrenda” (3:8).

E patronchi aki ta bisto shete biaha den e buki: 1:2-3; 1:6-7; 2:10-16; 2:17; 3:7; 3:8; 3:13-14. E siñansa ku ta sali for di e diálogo aki ta lo siguiente: 1) Dios ta stima Jakòb (1:2-5); 2) Dios ta tata di Israel i ta deseá adorashon sinsero (1:6-9); 3) Dios ta Tata di tur habitante di Israel i ta eksigí fieltad di nan parti (2:10-16); 4) Dios ta hustu, i p'esei E ta deseá onestidat, no palabranan so (2:17 – 3:5); 5) Dios ta fiel pa kumpli ku Su palabra i ta deseá adorashon sinsero (3:6-12); 6) Dios ta deseá onestidat (3:13 – 4:3).

Malakias lo tabata un bon dosente! El a presentá su kaso na un forma lógiko i komprendibel ku bon argumentonan.

## **B. FREKUENSIA KU DIOS TA PAPIA DEN E BUKI**

Sgun porsentahe, Dios ta papia ku mas frekuensa den e buki di Malakias ku tur otro buki profétiko. Di e 55 versíkulo den buki di Malakias, 47 di nan ta e palabranan di Dios.

## **C. SITANAN DI E BUKI**

Ta parse ku Malakias a pone énfasis riba e dia di SEÑOR. E “dia” ta aparesé sinku biaha den e buki—tur sinku biaha den e último dos kapítulo (3:2,17; 4:1,3,5).

## **D. SITANAN DI E BUKI**

Algun buki di Tèstament Nobo ta sita Malakias. Romanonan 9:13 ta sita 1:2-3. Mateo 11:10 i Marko 1:2 ta sita 3:1. I tantu Marko 9:11-12 komo Lukas 1:17 ta kontené referensia indirekto na 4:5.

## **E. DESPUES DI E BUKI**

Despues di Malakias, ta sigui 400 aña di silencio. Tabatin ningun profeta den e era ei segun nos sa. Ningun Skritura a wòrdu skirbí durante e síglonan ei. Sinembargo e tabata un era ku Dios tabata prepará mundu pa e tempu eksakto ku Jesus lo bin. “Ma ora ku e plenitut di tempu a yega, Dios a manda Su Yu, nasí di un muhé, nasí bou di Lei” (Galationan 4:4).

## **Literatura Konsultá**

Archer, Gleason L. Jr., *A Survey of the Old Testament Introduction* (Chicago: Moody Press, 1985), p. 438-440.

Baxter, J. Sidlow, *Explore the Book* (Grand Rapids: Zondervan Publishing House, 1960), vol. 4, p. 258-269.

Benware, Paul N., *Survey of the Old Testament* (Chicago: Moody Press, 1988), p. 234-236.

Douglas, Alban, *Old Testament Survey* anotashon di lèsnan na Prairie Bible Institute (Three Hills, 1983), p. 119.

Demaray, Donald E., *A Layman's Guide to Our Bible* (Los Angeles: Cowman Publishing Company, 1964), p. 120-121.

Freeman, Hobart E., *An Introduction to the Old Testament Prophets* (Chicago: Moody Press, 1972), p. 347-355.



- Hill, Andrew E. & Walton, John H., *A Survey of the Old Testament* (Grand Rapids: Zondervan Publishing House, 1991), p. 425-431
- Jensen, Irving L., *Jensen's Survey of the Old Testament* (Chicago: Moody Bible Institute, 1978), p. 467-472.
- McGee, J. Vernon, *Thru the Bible* notes, p. 321-322.
- Mears, Henrietta C., *What the Bible is All About* (Minneapolis: World Wide Publications, 1966), p. 332-336.
- Miller, Adam W., *Brief Introduction to the Old Testament* (Anderson, Indiana, Warner Press, 1964), p. 167-169.
- Wood, Leon J., *The Prophets of Israel* (Grand Rapids: Baker Book House, 1979), p. 373-377.